


von Wulf Wager

Hochzeitspanna



Am vorletschta Samschtag han i nomol g'heiratet. Obwohl, Männer heiratet jo net, die werdat g'heiratet. Die Frau isch nämlich dia oinzig Beute, wo ihrem Jäger auflauert!

Der Dag hot mit zemliche Panna a'gfangt. Z' erscht isch an dem Schmuck, den i meira Frau gschenkt han, a Riegele abbrocha. Nix dra-

matischs, aber se hot's halt net a'zieha kenna. No isch mr mei Taschäuhrle nag'hagelt ond 's Glas en tausend Scherba vrspronga. Die dritte Kataschdrof isch glei druf en da Hof rei gfahra. Wo i no en da Hof naguckt han, weil i a Oldtimer-Schnurra gherth han, hot mi schier da Schlag troffa. Do isch zwar en Oldtimer gstande, aber net der, den i bschdellt han. Dem Fahrer war des mega-peinlich. Aber der ursprüngliche sei am Morga net a'gloff. I han no gsait, dass mr mit dem neua sicher au net weit kommat, weil do grad 's Kühlwasser in mein Hof laufa dät. Do hot's dem Fahrer schier da Sponta naus. Notdürftig hot er den Kühlwasserschlauch gflickt ond mir send wohlbehalta en dr Kirch a'komma. Während mir no schee traut worda send, isch dr Fahrer schnell nomol en sei Garage ond hot a dritt's Auto rauszoga, da Bloamaschmuck omontiert, ond isch no rechtzeitig wieder do gwää. So warat mir sicher 's oinzig Brautpaar, wo an oira Hochzeit drei Oldtimer-Brautauto vrschliessa hot. Manch oiner verschleißt drei Bräut. No isch mr's so rom doch liaber. Aber beim Rescht vom Fescht hot no alles klappt...

Bis näggschd Woch

Ihr

Wulf Wager

Alle Kolumna zom Nochlesa

onder: www.woascht.de oder em facebook em Wulf Wager Fanclub